



PEDRO CALUNGSOD

Formasaun animadór sira

DATA no FATIN MORIS: Nia moris iha tinan 1655 iha ilha Cebu (Filipinas).
La iha informasaun kona-ba ninia família ka kondisaun moris nian

LABARIK

Husi ki'ik, nia tuir atividade Jesuita sira iha ninia rai; karik nia estuda ho sira; maibé ho Jesuita sira nia aprende atu hadomi Maromak no sai matenek liu iha Katekizmu. Tan ne'e, Jesuita sira hanorin ba nia lian español, nune'e nia bele sai tradutór, bainhira padre sira haklaken evanjellu iha ninia rai.

Nia hatudu mós kapasidade atu hananu, pinta, halo drama, buat hirak ne'e tulun nia atu dada kolega sira ba rona katekizmu; no mós, entre sira ne'ebé serbí Missa, nia mak ida ne'ebé hatene halo ho devosaun boot. Nia iha kapasidade nu'udar badai ai nian, nune'e bele tulun padre sira iha aspetu konkretu, atu hadi'ak uma sira.

ADOLEXENTE

Bainhira nia tinan 14, Jesuita sira hili nia atu akompaña misionáriu sira nu'udar "tulun katekista", iha ilha "Ladrones" (na'okteen sira nian), tanba padre sira hakarak envolve foin-s'e sira iha prosesu evanjelizasaun nian. Povu sira la ta'uk atu hakbesik foin-sa'e sira ne'e duke ba misionáriu malae sira no mós la susar ba tulun misionáriu foin-sa'e sira atu halo ema sira rona sira nia lia-menon.

Moris iha fatin ne'ebá susar tebes: bainhira ro to'o, susar atu hetan fatin atu bele tun tanba foho sira tun kedas to'o tasi, iha ai-laran boot, iha ne'ebé fasil atu lakon dalan, dala barak udan boot no bee taka dalan, ro sira ladún liu husi ne'ebá, nune'e susar ba misionáriu sira atu hetan materiál no buat seluk tan ne'ebé sira presiza ba sira-nia servisu. Maski susar oinoin sira ne'e, misionáriu sira deside atu hela no ho laran manas apostolika sira haklaken Maromak nia domin.

Maromak fó premiu ba sira-nia konstánsia no sakrifisiu, nune'e, ema barak nakfilak an no husu atu sai sarani. Akontesimentu sira ne'e halo matan dook ruma no ema fila liman sira sai laran moras hasoru misionáriu sira no sira nia ajudante sira.

Akontesimentu ne'ebé provoka Pedro nia mate

Matan dook ida husi Xina, hahú habelar informasaun katak misionáriu sira uza bee ho venenu atu sarani labarik sira. Nia temi labarik sira nia naran ne'ebé mate durante fulan ruma, ssira husi knua ida ne'ebé, hodi hateteni, nu'udar esplikasaun, katak misionáriu sira foin sarani labarik sira ne'e.

Iha lora 2 abril 1672, Pedro hamutuk ho superiór misaun nian, pe. Diego Luis de San Vitores, to'o knua Thomhorn no sira rona katak labarik feto ida foin moris. Nia aman, Matapang, tinan ruma antes, sai sarani, maibé depois nia fiar ba buat ne'ebé matan dook xinés hateten, nune'e, nia hadook an husi padre sira.

Bainhira Matapang haree misionáriu na'in rua, nia bandu ba sira atu hakbesik ninia oan, tanba nia la kohi sarani nia, maibé pe. Diego hanoin katak la susar atu halo nia troka ninia hanoin tanba uluk nia mós sarani no padre sira nia belun. Tan ne'e, sira na'in rua halibur hamutuk sarani sira ne'ebé hela iha Thomhorn, hodi hahú hananu, reza no ko'alia

kona-ba lialoos Jezús nian. Misionáriu na'in rua konvida matapang atu reza hamutuk ho sira, maibé nia hadook an hodi tolok sira no Maromak. Nakon ho odiu, Matapang buka ema ruma ne'ebé bele tulun nia atu duni misionáriu sira. Nia hetan Hirao, ne'ebé seidauk sarani, maibé respeita padre sira hodi hanoin ba buat di'ak barak ne'ebé sira halo iha fatin ne'ebá. Durante tempu ne'ebé Matapang buka apoiu, pe. Diego husu lisensa ba Matapang nia feen atu bele sarani ninia oan feto. Bainhira

Matapang rona notisia ida ne'e, ho laran nakali nia halai hodi foti rama no hahú uza rama kontra Pedro.

Sasin sira hatu'o katak Pedro bele halai makaas no sees rama oan sira, (liuliu tanba nia, hanesan katekista hotu, la lori surik ka arma seluk atu bele ataka ka defende an) maibé nia hanoin fali ba pe. Diego ne'ebé katuas, no hein nia. Rama oan ida sona borus Pedro iha hirus matan, tan ne'e pe. Diego kasu kedas nia sala hotu, maibé Hirao mai tuir no, ho fatuk ida, fera sira na'in rua niaulun. Hafoin, sira na'in rua foti sasán uitoan ne'eb'e martir na'in rua lori, hatama sira iha bero ida no soe sira nia isin iha tasi laran.

Oinsá Pedro sai beatu no santu

Iha 1981, Diosese Cebu nian prepara an atu selebra tinan 20 nu'udar Diosese, nune'e Bispo no amlulik sira hanoin atu husu pe. Diego nia beatifikasaun. Foufoun sira la hanoin ba Pedro, maibé, bainhira pe. Diego sai beatu, iha 1985, sira hetan dokumentu antigu ne'ebé ko'alia kona-ba Pedro nia sasin no nia tulun iha evanjelizasaun, nune'e, Arsibispo Ricardo Cardinal Vidal hahú prosesu atu rekoñese Pedro nia importánsia no nia sasin.

Amo Papa João Paulo II gosta liu Arsibispu nia proposta, no hakotu atu foti Pedro nu'udar Beatu iha tinan 2000, tinan Jubilar nian, nu'udar modelu ba foin-sa'e no leigu sira iha Azía.

Loron Mundiál Misaun nian 2012, Amo Papa Bentu XVI, foti nia nu'udar Santu.

Amo Papa João Paulo II nia liafuan sira ba Pedro nia beatifikasaun

Husi ki'ik kedas, Pedro dehan katak nia an rasik ba Kristu de'it no hatán ho laran luak ba Na'i nia bolun. Foin-sa'e sira ohin loran nian bele hetan aten-barani no kbiit iha Pedro nia ezemplu: ninia domin ba Jezús halo nia saran nia moris, maski adolexente de'it, atu hanorin fiar nu'udar katekista leigu. Hodi husik ninia família no nia belun sira, nia simu pe. Diego de San Vitores nia konvite atu tulun iha Misaun ba povu Chamorro sira. Ho espíritu fiar nian, domin boot ba Eukaristia no ba Na'in Feto, nia simu serbisu ida ne'e, prontu atu hasoru problema no difikuldade oinoin. Iha perigu laran, nia la haluha pe. Diego, maibé hanesan "Kristu nia soldadu di'ak" nia hakotu atu mate iha misionáriu nia sorin.

ATU HATENE PEDRO CALUNKSOD DI'AK LIU TAN

- ➔ *Iha YouTube bele hetan video badak kona-ba Pedro, maibé ho lian inglés ka tagalog. Iha entrevista ba sarani sira, knananuk no mós filme badak.*
- ➔ *Pedro nia istória bele hanorin saida ba ó-nia atividade nu'udar animadór?*
- ➔ *Amo Papa João Paulo II hatudu Pedro nu'udar modelu ba foin-sa'e sira: ó bele moris tuir aspetu ida ne'ebé?*